



15. august

UKA 2019/86

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinit tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaanngitsumik nunat allat ilinniarfigalugit aaqqissuussinissaq.

(Inatsisartunut ilaasortaq Aqqalu C. Jerimiassen, Atassut)

Tunngavilersuut

Aallarniutitut taaginnaraanni, ajuusaarpallaarpugut, mianerinnippallaarpugut takornarissanullu nunatsinnut tikittartunut iluanaarnianggippallaarujussuarluta.

Nunarsuatta sinnerani takornartaanngilluinnarpoq sumulluunniit unnuisarfimmut tikikkaagatta pinngitsaaliissummik akiliuteqartitaasarnerput. Tamannali kamaatigeqqajarneq ajorparput illuanilli pisussaaffittut isigiinnartarlugu, tassami nuna tikitarput akileraarfigisussaallugu qanorluunniit nalunngikannereertarparput kunngeqarfiup avataanut pitilluta.

Unnuisarfinni assigiinngiiaartuni nunatsinni unnuinermut ataatsimut 40 koruunik ikkussisoqarsinnaasuungaluarpat, siornalu unnuinermut naatsorsuutit Naatsorsueqqissaartarfimmeersut malissagaanni assersuutigilarlugit 259.282-iusut taakkunani affai takornariaasimappata akunnaallilikannerlugu inissikkaanni 130.000-inngorlugit 5.2 million koruunik isertinneqarsinnaangaluarmata. Sapinngisamik annertunaarneqassanngilaq akitsuusiunneqartussa, tassami takornissat nujuitsinnginnissaat pisussaaffigingatsiguttaq.

Maannattaq eqqartortuarparput nunat tamalaat akornanni mittarfiit Ilulissani Nuummilu pilertussat, taakkulu takornariaqarnikkut siuariaataangaarnissaat siulittuutaajuarpoq. Siulittuutillumi eqqutissappata nunatsinnuttaq tamanna iluaqutaasariaqarpoq, nunammi tamalaat akornganni mittarfiit innuttaasut qitiutillugit aallaaveqartariaqarmata. Takornarissammi amerleriarnersigut akitsuutimineerannguakkt aningaasat isertut amerliartuaartillugit nunatsinni inuussutissarsiornikkut namminersortortatsinnut siuarsaanissatsinnut suli siuarsaanerunissamut akissarput qaffariartussammat. Malittaani takornariaqarnermut ilinniarfeqarfinnut suli pitsaanerumik siuarsaasinnaanerput periarfissagissaarnerulissammat.



Tamannali isertitaqarnerusinnaaneq tassaassanngilaq inuussutissarsiummut ataasiinnarmut iluaqutaassasoq, tassami isorliunerusunut inuussutissarsiornikkut aningaasaliissutitut isorliunerusut takornariaqarnikkut mittarfissuartaarnerup malittaaniq iluaquserneqarnissaattaq anguneqartariaqarmat innutaasuni toqqiissisimaneq pilersissinnaajumallugu.

Atassummiik kissaatigivarput takornariaqarneq nunarput tamakkerlugu iluaqutaasariaqartoq, takornariaqarnerup nunatta aningaasaqarnera toqqaannartumik sunniuteqaqataaffigisariaqaraa. Tamannalu pillugu Naalakkersuisut misissuisariaqartut qanoq iluaqutaanerpaamik isertitaqarsinnaanersoq nunarput innarliutaanngitsumik takornariaqarnerup ineriartorneranut.

Aningaasatigut ingerlatsinikkullu pisortanut kingunerisassai:

Naatsorsuutigineqassaaq misissuineranut aningaasartuutaasussat ukiup ataatsip iluani AC fuldmægtigep sulinissaaniq naleqassasoq, tassa 500.000 kr.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.